

**ANG**

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXIV No. 12
Hulyo 21, 2003
www.philippinerevolution.org

Editorial

Pamatukan kag paslawon ang pagtapna sa ligal nga demokratikong hublag

Isa ka tikang nga daw-Marcos ang mandu ni Pres. Gloria Arroyo nga tapnaon kuno ang mga “ligal nga prenteng organisasyon sang Partido Komunista.” Kag pareho sa pagdeklarar ni Marcos sang layi militar sadtong 1972, indi lamang napaslawan ang mandu nga ini nga pungan ang nagapadayon nga pagsulong sang rebolusyonaryong kahublagan. Labi pa sini nga ginaduso ang pumuluyong Pilipino nga magsuporta kag magpasakup sa Bag-ong Hangaway sang Banwa (BHB) kag mag-entra sa armadong rebolusyonaryong hublag.

Ang mandu nga ini isa ka desperadong tikang sa atubang sang sunod-sunod nga madinalag-on kag nagalanog nga taktikal nga opensiba sang BHB. Sa kapaslawan nga pungan ang pagsulong sang armadong rebolusyon sa pihak sang “todo gera kontra-terorismo” sang rehimeng Arroyo, labing ginainitan sini subong ang mga ligal nga organisasyong patriyotiko kag demokratiko nga malisyosong ginapareho sa PKP kag BHB agud hatagan-rason ang paggamit sang kusog sang estado batuk sa mga

ini.

Pareho sa nagtaliwan nga rehimen, militarismo kag pasistang terorismo ang sabat sang rehimeng Arroyo—sa sugyot sang amo sini nga imperyalismong US—sa nagalapad kag nagakusog nga pagpamatuk kag pagbatu sang masa nga labing ginapaantos sang krisis sang reaksyunaryong nagaharing sistema. Ang madalom nga diskuntento kag pagkatublag sang malapad nga pumuluyo ginbunga sang nagadasig nga pagtibusok sang ekonomya kag sang ila pangabuhian, kag sang wala ikasarang sang nagaharing sahi nga makasabat bisan sa mga pinakasandigan nga kinahanglanon sang mayorya sang pumuluyo kag paglala sang pagpamigos kag pagpang-ipit sa ila.

Indi lamang mapaslawan ang imperyalismong US kag mga lokal nga reaksyunaryong nagaharing sahi sa paglubad sa tuman kadalom nga krisis sa ekonomya kag pulitika sang garuk nga sistemang mala-kolonyal kag malapyudal. Labi pa sini ginapalala ang krisis sang nagtaliwan nga dekada sang lipong nga ginduso sang sunod-sunod nga mga papet nga rehimen ang pungsod sa todo nga pagpang-halit sang imperyalistang globalisasyon kag polisiyang neoliberal nga ginpanaog sang imperya-



Sa isyu nga ini...

**Nagaigting ang
banggianay
Cojuangco-Arroyo**

PAHINA 4

**Pagtukod sg sanga sg
MAKIBAKA sa isa
baryo sa Bikol**

PAHINA 6

**Pagbatu sa ilegal nga
droga sa Eastern
Visayas**

PAHINA 7

lismong US paagi sa IMF-WB. Nagbunga ini sang labing pagkahamulag sang rehimen kag pag-igting sang mga banggianay sa kubay sang mga reaksyunaryo.

Bisan napukan ang pasistang rehimeng Marcos, nagpabilin sa sentro sang gahum ang anuman nga reaksyunaryong hubon ang pasistang makinarya burukratiko-militar, amo man ang mga mapiguson nga layi kag mandu sang diktadurya batuk sa mga demokratiko kag progresibong paghulag kag paghimakas sang masa sang pumuluyo.

Wala kutod ang pagpanalakay kag pag-atake sang rehimeng Arroyo sa ligal kag demokratikong kahublagan. Lapnagon ang baraghal nga pagpamatay sa mga lider kag aktibista nga nagapamatuk kag nagabatu sa lapnagon nga militarisasyon kag pasistang terorismo sang reaksyunaryong estado sa kaumhan kag kasyudaran. Tampok nga halimbawa ang pag-atake sa mga lider sang CAGUIMUNGAN sa Baggao, Cagayan sining Hulyo (basahon ang kaangot nga balita sa pahina 3) kag ang pagpatay sa mga aktibista nga sanday Eden Marcelana kag Eddie Gumanoy sa Timog Katagalugan sadtong Abril.

Mabaskog ang pasistang pagpamahug, pagpang-ipit kag pagpanalakay sa mga ligal nga organisasyon sang mga mangunguma, mamumugon, pamamatan-on, kababaihan kag iban pa nga organisasyon nga nagabatu para sa demokratikong interes kag kinamatarung sang mga pinakapigos kag labing ginahimuslan nga mga sektor sang katilingban.

Lapnagon ang pagpangtapna sa mga welga sang mga mamumugon kag pagbungkag sang ila mga unyon kag asosasyon. Sining ulihi, ginademanda pa sang mga dumulong nga monopolyo kapitalista kag dalagku nga kumprador kapitalista, nga ipatuman sang papet nga guberno ang 10 tuig nga moratoryum sa pagbag-o sa mga Collective Bargaining Agreement kag katuwang sini nga pagbawal sa welga.

Sa tunga sang mga ini, importante ang padayon nga pagtinguha sa pagpalapad kag pagpabaskog sang ligal nga kahublagan demokratiko. Kinahanglan labing palaparaon kag pataason ang mga protesta kag pangmasang paghimakas para batuan ang pasistang terorismo kag padayon nga pangapiinan kag ipursiger ang mga kina-

matarung pangpulitika kag pangekonomya sang pumuluyo. Kinahanglan militante nga manindugan kag indi mahadlok sa pasistang pagpamahug ang pumuluyo kag mga demokratiko kag progresibong pwersa.

Mapaslawan kag mapaslawan ang mga pasistang padihot kag pagpanalakay kon magpursiger ang pumuluyo kag kahublagan sa pagbatu sa mga ini, wala untat nga buyukon ang pinakamalapad nga kubay sang pumuluyo kag alyansa sang mga pwersa batuk diri kag gamiton ang kumbinasyon sang nagkalain-lain nga pamaagi sang organisasyon kag pagbatu. Kadungnan sini, nagakadapat man palaparon kag padalumon ang likum nga rebolusyonaryong kahublagan agud makapursiger kag magapabilin nga epektibo sa pagbatu bisan maghimo ang kaaway sang pinakamalaut nga tikang—sa direktang pasista nga teroristang pagtapna—ang mga lokal nga reaksyunarong nagaharing sahi.

Sa tunga sining nagaigting nga pasistang terorismo, labi nga malahalon ang tanan-nga-bahin nga pagpasulong sang mga pangmasang paghimakas ang dugang nga pagpabakod sang hangaway sang banwa kag pagpasulong sang armado nga rebolusyonaryong paghimakas. Kinahanglan padayon nga paigtingon ang mga taktikal nga opensiba sang BHB base sa ikasarang sang hangaway kag baseng masa. Kinahanglan ang ubos-kusog nga labing palaparon kag pabaskugon ang mga prenteng gerilya sa tanan nga estratehikong bahin sang kapuluan.

Pabayaron naton sang mahal ang mga imperyalista kag reaksyunaryo sa wala untat nila nga pagpalala sa pagpanghukhok kag pasistang kalakasan batuk sa masa sang pumuluyo. **AB**



Tuig XXXIV No. 12 Hulyo 21, 2003

Ang **Ang Bayan** ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

www.philippinerevolution.org

Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: **angbayan@yahoo.com**

Kaundan

Editoryal	1
Kalakasan, dinayaay sa eleksyon sa Isabela	3
Banggianay Cojuangco-Arroyo	4
Mga opensiba sg BHB	5
Mga koresponsal	
Sanga sg MAKIBAKA sa Bikol	6
Pagbatu sa iligal nga droga sa EV	7
AFP, PNP, mga sindikato sa droga	8
Obispo sg imol	9
Manubo nga upisyal kag ordinaryong suldado, ginatublag	10
Nagapalala nga ekonomya sg US	11
Balita	12

Ang **Ang Bayan** ginabantala duha ka beses kada bulan sang Komite Sentral sang Partido Komunista sang Pilipinas.


Kalakasan kag pagdinayaay sa eleksyon sa Isabela

Salaming sang reaksyunaryong pulitika sa pungsodnon nga lebel ang kahigko kag kalakasan sang lokal nga pulitika sa Isabela. Subong pa lamang makita na diri ang madangtan sa palaabuton nga nasyunal eleksyon.

Sadtong Mayo 12, baraghal nga gindaya sang dinastiyang Dy sa Isabela ang espesyal nga eleksyon para pilion ang mabulos kay Antonio Abaya, ang namatay nga kongresman para sa ika-apat nga distrito sang prubinsya. Manok sang mga Dy kag sang Nationalist People's Coalition (NPC) ni Eduardo "Danding" Cojuangco si Giorgidi Aggabao, gaway nila kag paryente ni Cojuangco. Ginpulihan nila si Dr. Asuncion Abaya, ang byuda sang napatay nga kongresman. Isa sa mga pangunahon nga balwarte ni Cojuangco ang Isabela kag labi nga ginaamligan sang himbunanay Cojuangco-Dy ang gahum pangpulitika kag pang-ekonomya diri. Gina-lauman nila nga paagi kay Aggabao mapadayon ang mga kontra-

pumuluyo nila nga proyekto, pangunahon na ang malaparan nga pagpang-agaw duta para sa plan-tasyon sang balinghoy, nga sining ulihi nagsakup na sa ikaapat nga distrito sang Isabela. Kinahanglan man nila ipabilin nga solido ang lugar para sa mga plano nila sa eleksyon 2004.

Sa pihak sining wala kaluoy nga pagtapna kag kalakasan sang himbunanay Cojuangco-Dy-Aggabao, pagbaha sang kwarta kag pagbakal sang mga boto, maathag nga ginlutos ni Abaya si Aggabao base sa pag-isip sang mga boto sa mga munisipalidad. Pero nabaliskad ang resulta pag-abot sa *canvassing* sa Ilagan, kabisera sang Isabela, kon sa diin ginbantayan mismo ni Dy



kag mga tropa sang pulis kag 5th ID ang "pag-isip" kag ginbawal magsaksi ang publiko, pati na ang mga poll watcher kag abugado ni Abaya.


Indi pa nakuntento diri, sadtong Mayo 15 ginpatay sang mga tinawo ni Dy si Engr. Joaquin Soriano, ang *campaign manager* ni Abaya kag *municipal coordinator* sang Bayan Muna sa Jones, bangud sa pagbalibad sini nga suportahan si Aggabao. Lubos kadamol ang guya nga gintinguha pa sang kam-po ni Dy nga mag-intriga batuk sa Bag-ong Hangaway sang Banwa kag pagguwaon ini nga nagpatay kay Soriano. Nagpadala sila sa Bombo Radyo dzNC sang paltik nga pahayag ni Ka Delio Baladon, tagapamaba sang Benito Tesoro Command sang BHB sa timog Isabela, nga nagaako sa pagpatay kay Soriano. Ugaling gilayon namutikan sang mga taga-Bombo Radyo nga indi matuod ang pahayag. Nakumpirma man nga militar ang nagdul-ong sang pahayag.

Masunod nga adlaw, ginlunsar ang isa ka *motorcade* nga nagalibot sa halos tanan nga banwa sang ikaapat nga distrito agud pakamauton ang natabo dinayaay kag ang pagpatay kay Soriano. Pila ka gatos nga salakyan kag libo nga pumuluyo ang nagpartisipar diri, upod ang mga katapu sang Bayan Muna, Bagong Alyansang Makabayan kag iban pa nga progresibong

Mga lider-mangunguma sa Cagayan, gintuyo patyon sang 41st IB

GINTUYO nga patyon sang mga elemento sang 41st IB ang pila ka lider-mangunguma sa Baggao, Cagayan sadtong Hulyo 1. Ginpanglabo sang mga suldado sa atubang mismo sang kampo sang RSOT/41st IB sanday Benito Abarientos, Isbelo Adviento, Ronald Javier kag Joey Javier. Halos mabulag ang isa ka braso ni Javier kag madamo nga labo sa nanari-saring parte sang iya lawas. Sanday Adviento kag Reyes nakadalagan kag nakapangayo sang bulig sa mga pumuluyo agud dalhon sa ospital si Javier. Si Javier ang tagapamuno sang CAGUIMUNGAN, isa ka progresibong alyansa sang mga mangunguma sa prubinsya.

Makapilang beses nga gintinguhaan pahipuson sang 41st IB ang militansya kag paghulag sang mga manunguma sa Cagayan paagi sa pagsabwag sang mabaskog nga pagtapna kag paggamit kusog.

Sa atubang sang maigting nga militarisasyon sa ila lugar, nagapabilin nga nagabanaag ang rekord sang mga mangunguma sang Baggao sa militante nga pagtib-ong sa ila mga kinamatarung kag madinalag-on nga pag-angkon sang benepisyo kag kaayuhan sosyal. 

Sundan sa "Kalakasan...", pahina 4

Nagasingki nga banggianay Cojuangco-Arroyo

Sining Hulyo, gindeklarar sang Sandiganbayan nga pangpubliko ang kinaia sang pondo nga *coco levy* nga kadam-an nagadeposito sa United Coconut Planters Bank (UCPB). Ini ang gingamit ni Eduardo “Danding” Cojuangco agud makaptan ang 27% sang sapi sang UCPB sa San Miguel Corporation (SMC) kag mahimo gingamit man niya agud baklon ang 20% pa nga sapi sa SMC nga direkta sa iya ngalan. Base sa husgar sang korte, ilegal ang basehan sang pagkapot subong ni Cojuangco sang mga sapi sang UCPB, na amo nga pinakadaku sa SMC.

Kon masunod ang amo nga desisyon, mga tiglawas na sang gubyernong Arroyo ang magabulos sa mga tiglawas ni Cojuangco sa Board of Directors sang SMC. May kinamatarung pa gihapon ang guberno nga magbutang sang bag-o nga tagapangulo sang SMC kag kampo na ni Arroyo ang magakontrol sa isa sa pinakadaku kag pinakamabaskog nga nagakita nga empresa sa Pilipinas.

Pero nagapabilin gihapon nga tagapangulo kag desaysibo ang kontrol ni Cojuangco sa SMC tubtub sa Pebrero 2004 base sa isa ka “temporaryo nga kasugtanan” sa tunga sini kag sang Presidential Commission on Good Government (PCGG). Bagud diri, mausisa ang iya kontrol sa SMC kag iba pa nga mga kumpanya ginbakal gamit ang pondo nga *coco levy* sa maabot nga eleksyon presidensyal. Ang mga ini ang nangin pangunahon nga premyo, upod ang pondo nga *coco levy* kag iba pang ginkawat nga manggad ni Cojuangco, sa sin-o man nga magadaog sa 2004. Pat-ud nga mangin mapintas kag puno sang pagdinaya ang palaabuton nga

eleksyon bangud sini. Subong pa lamang, nagpamahug na si Cojuangco nga mabaskog niya nga batuan ang ano man nga pagtinguha agawon sa iya ang kontrol sa SMC kag iba pa nga ginkawat nga manggad.

Ang temprano nga pagkabulgar sang himbunanay, pag-ani sang mabaskog nga pagkamalaut kag mabaskog nga pagpamatuk diri sang mga militanteng pwersa, sang iban pa nga kritiko kag sang pumuluyo nagdangat sa pagkaguba sang serye sang negosasyon sa tunga nanday Arroyo kag Cojuangco angot sa *coco levy*. Sunod-sunod nga napaslawan ang ila sikreto tani nga mga areglo agud magpabilin nga pribado ang pondo nga *coco levy* kag maghimbunanay sa tungaay sang UCPB, SMC kag iba pa nga katuwang sini nga dalagku nga negosyo.

Daku ang pagsalig ni Arroyo sa pagpakigkoalisyon kag suporta pinansyal ni Cojuangco kag sa indi pagdalagan ukon pagsuporta ni Cojuangco sa iban nga kandidato. Ang pagkapihak sang ila oportunisang koalisyon magaresulta lamang



sa labing paghina sang makinarya pang-eleksyon kag labi nga pagkitid sang gamay nga tsansa nga magadaog si Arroyo sa palaabuton nga eleksyon.

Malauman nga magahimo si Cojuangco sang mga tikang agud konsolidahon kag pabaskugon ang oposisyon agud suportahan ang pagkandidato niya ukon sang sin-o man pagapilion niya nga suportahan sa maabot nga eleksyon. Gusto gid tani ni Cojuangco nga si Arroyo amo mangin kandidato gihapon sa nagapamuno nga paksyon bangud pinakamadali ini malutos sang sin-o man nga padalagnon sang oposisyon. Sa atubang sini, igaduso sang mga hitabo nga ini nga mag-

Sundan sa “Nagasingki...,” pahina 5

“Kalakasan...,” halin sa pahina 3

organisasyon. Nagpagguwa sang pahayag kag nag-upod sa mga aksyong protesta ang mga mangu-nguma, pamatan-on, tawong simbahan, propesyunal, pulitiko nga anti-Dy kag iba pang pumuluyo.

Sadtong Mayo 24, naglunsar

liwat sang *motorcade* kag gintambungan ini sang linibo katawo. Pagkatapos sini nagkadto ang masobra 1,000 pumuluyo sa lubong ni Soriano kon sa diin ginkundenar sang nagkalain-lain nga naghambal ang guban Dy. Nagserbi nga pinal nga bahin ang pagbasa sa pagpasidungog sang Benito Tesoro Com-

mand kay Soriano. Ang amo kabaskog nga pagpakamalaut sa dinastiyang Dy, nga sa amo pa lamang nasaksihan sa timog Isabela, patud nga magabaskog samtang nagapalapit ang eleksyon 2004 kag mas ginapahigko sang himbunanay Cojuangco-Dy ang pagmaniobra sa pulitika. AB




himo si Arroyo sang labing despe-radong mga tikang bunga sang pursigidong ambisyon niya nga magpabilin sa poder.

Ang pagsingki sang inaway bahin sa *coco levy* amo ang punta sang pila ka tuig na nga pag-inagaway sang mga nagapanguna nga burukrata kapitalista sa pondo nga indi sila ang tag-iya. Sa kadamuon na nga liko kag tiyog sang inaway nga ini, wala gid nangin pangunahon nga adyenda sang mga daluk-dalok nga burukrata nga nagalaway sa *coco levy* ang interes kag kasulhayan sang sektor nga amo ang tunay nga may kinamatarung sa pondo—ang milyon nga manuglubi nga masobra 17 tuig nga pilit ginakuhaan sang buhis nga ini.

Ginalaragway sini ang dugang pa nga pagkagaruk sang mga reaksyunaryong nagaharing sahi. Pina-kamatingkad sini ang burukratiko-kapitalista nga kinaiya sang pina-kadaku nga manggad kag ginahalinan sang dalagku nga propyedad kumprador sa Pilipinas. Masnahon katama ang importante nga papel sa burukrasya kag dalagkuan nga paghugakom sang kaban sang banwa para sa dugang nga pagpamanggad kag pagpabaskog sang negosyo sang anuman nga nagaharing guban sang nagaharing sahi. Mabaskog ang himbunanay kag banggianay sang dalagku nga burukrata-kapitalista agud hugakumon ang burukrasya kag kaban sang banwa, dalok nga mag-inagaway, kag labaw sa tanan, agaway kag dingutan ang banwa nga lubos nagaantos kag nagakinahanglan sang pangabuhian kag mga serbisyo sosyal. Labi pa nga magagting ang garuk nga pag-inagaway sang mga nagaharing paksyon sa kahimtangan nga nagakitid nga manggad nga mahimo tulungaon sang nangkalin-lain nga paksyon. **AB**

19 ka armas naagaw sa 2 opensiba sa Bontoc

Napulo'g siyam ka mataas nga riple kag iban pa nga gamit-militar ang naagaw sang mga hangaway sang Leonardo Pacci Command sang Bag-ong Hangaway sang Banwa (BHB) sa duha ka nagasulunod nga tatikal nga opensiba sining Hulyo 15 sa Bontoc, Mountain Province.



Nagapauli sa ila hedkwarters sa Fort Magsaysay sa Laur, Nueva Ecija ang mga tropa sang 71st IB sang ambusan sang isa ka platoon sang BHB ang ginasakan nila nga siksabay bandang alas-3 sang hapon sa Sityo Sukib, Talubin, Bontoc. Nakakumpiska ang mga Pulang hangaway sang pito ka M16, isa ka M14 kag isa ka .45. Namatay sa engkwentro ang walo ka suldado kag malubha nga napilasan ang isa pa.

Antes sini, ginsalakay sang BHB sadtong aga man ang detatsment sang 54th IB sa Talubin Proper. Nakontrol sang mga Pulang hangaway ang detatsment kag ginsunog ini. Naagaw nila ang lima ka M14, lima ka garand, isa ka karbin kag mga bala.

Duha ka suldado ang napatay kag napilasan ang duha pa.

Samtang, suno sa pinakaulihi nga report, siyam ka suldado ang napatay sa inaway sa tunga sang BHB kag AFP sadtong Hulyo 5 sa East Maguisguis, Botolan, Zambales. Nauna nga ginreport nga lima ka suldado ang napilasan.

PNP sa Catbalogan, gin-ambus; 2 armas naagaw

Isa ka M16 kag isa ka 9 mm ang nakumpiska kag isa ka pulis ang napilasan sang ambuson sang BHB sadtong hapon sang Hulyo 16 ang kotse nga ginasakan ni P/Supt. Conrado Calvario, hepe sang PNP sa Samar. Pakadto ang mga pulis sa Tacloban City agud mag-abi-abi kay Pres. Arroyo sang malukpan sang bomba ang ginasakan nila nga *patrol car* sa haywey sa Barangay Socorro, Catbalogan.

Mga suldado, pulis gin-ambus sa Abra


Gin-ambus sang isa ka iskwad sang Agustin Begnalen Command sang BHB sa Abra ang gintingub nga mga elemento sang 17th IB kag PNP sadtong Mayo 16 sa Barangay Lingas, Lagangilang, Abra. Duha ka suldado ang namatay kag apat ang napilasan. Hilway nga nakaatras ang BHB samtang wala gid makalunsar sang operasyon agud maglagas ang mga nakibot nga kaaway.

Agud takpan ang ila kahuy-anan, nagpalapta na lamang ang 17th IB sang intriga batuk sa BHB. Ginpasurender nila ang duha ka lalaki nga 10 tuig na nga naghalin sa Hangaway kag ginhambal man nila nga nagarekrut sang mga menor de edad ang BHB. (*Halin sa Dangadang, rebolusyonaryong pahayagan sa Ilocos-Cordillera.*) **AB**



Pagtukod sang sanga sang Makibaka sa isa ka baryo sa Bikol

Sa isa ka prubinsya sa Bikol, lubos na nga natukod ang pila ka asosasyong masa. Pamatuod ang mga ini sang kadalagan sa tanan nga bahin nga pagsulong sang rebolusyon sa prubinsya. Sadtong Hunyo, nangin saksi ang isa ka kaupod halin sa AB sa pagtukod sang isa ka sanga sang Makabayang Kilusan ng Bagong Kababaihan (Makibaka) sa isa ka baryo sa prubinsya.



Daan na nga natukod ang MAKIBAKA sa baryo nga ini matapos tukuron ang Pambansang Katipunan ng mga Magbubukid (PKM) sa lugar sadtong nagtaliwan nga tuig. Ugaling ginreorganisa ini sining Hunyo bangud sa una nga pagkatukod, wala maupod sa katapuan ang mga kababaihan nga katapu sang PKM. Liwat naghiwat sang kumperensya ang kababaihan halin sa tanan nga sityo sang baryo agud liwat tukuron ang sanga sang MAKIBAKA.

Sa bulig sang BHB kag Sanga sang Partido sa Lokalidad (SPL), nangin madali ang paghanda sa mga rekisito para sa pagtukod sang MAKIBAKA. Sadtong Hunyo 15, gintipon agud aregluhon ang mga nakuha nga kasaysayan sang kabuhi nga may mga kulang ukon indi maathag nga datos. Kadungan sini, ginhanda man ang mga datos bahin sa rebolusyonaryong kasaysayan sang baryo.

Masunod nga adlaw, nagpulong ang mga kaupod nga natalana sa paghanda sang mga rekisito. Gintunga-tunga nila ang pag-areglo sang burador sang isa ka tuig nga programa sang MAKIBAKA, sang rebolusyonaryong kasaysayan sang baryo kag sang mga kasaysayan sa kabuhi sang mga katapu.

Nagpulong man ang pila ka mga katapuan halin sa hangaway kag ang Komiteng Tagapagpatuman sang Sanga (KT-SPL) agud magbu-

lig sa paghanda sang iba pa nga mga rekisito. Ginhanda man ang mga teknikal nga kinahanglanon sang kumperensya pareho sang mga kagamitan kag pagkaon kag ang pagpangita sang mga magaasikaso kag magasiguro sa kusina kag seguridad.

Hunyo 18 ang kumperensya sang liwat nga pagtukod sang sanga sang MAKIBAKA. Sa 68 target nga kababaihan nga katapu, 42 ang nagtambong. Natabuan nga nakadungan sini ang miting sang mga ginikanan sa isa ka malapit nga eskwelahan, pero pagkatapos paathagan sang mga kababaihan ang mga titser sini, gin-atras sang eskwelahan ang nakaiskedyul nga pagmiting.

Sa kumperensya, gintamyaw sang nagadaguob nga palakpakan ang pamulong-pulong sang tagapamuno sang lokal nga sanga sang PKM nahanungod sa importansya sang pagtukod sang mga asosasyong masa kag ang pagtinguha nga hulu-halintang nga mapataas ang lebel sang paghiliusa sang pumuluyo sa baryo. Matapos ini, ginsaysay sang isa ka kumander ang kasaysayan sang baryo.

Agud magkilalahay ang mga katapu sang sanga, ginbasa ang ila mga kasaysayan sa kabuhi sa atubang sang kumperensya.

Bandang hapon na sang ginta-

lakay ang borador sang isa ka tuig nga programa sang sanga. Ginbukas ini sa mga komentaryo kag suhestyon sang mga myembro antes aprubahan. Pila lamang sa tampok nga unod sang programa ang pagtukod sang isa ka kwerpo sang mga instruktur, pagpatapu sa grupo pangdepensa sang baryo kag paglunsar sang mga proyekto pangpinansya.

Pagkatapos sini, ginpili sang kapulungan ang 16 sa pinakamaayo kag aktibo sa asosasyon bilang myembro sang Komiteng Balangay (KB). Halin sa 16, ginpili ang tagapamuno kag mga pangaduha nga tagapamuno sa organisasyon; edukasyon; pinansya at ekonomya; ikaayong lawas; kag depensa.

Mapagsik ang kada isa sa adlaw sang pagkatukod. Mabatyagan ang hugot nga paghiliusa sang kababaihan kag sang hangaway. Sa pagtapos sang bilog nga adlaw nga kumperensya, ginpasundayag ang Awit ng Pag-asa nga paborito nga kalantahon sang mga kaupod sa kumperensya sa pagtukod sang mga asosasyong masa.

“... Dahil mithi nati’y palayain,
Bawat isa sa pagkaalipin,
Sa gitna man ng gutom,
Kahirapa’t pasakit
Hindi-hindi tayo susuko...” **AB**



Pagbatu sa ilegal nga droga sa Eastern Visayas

"Pagpahamot lang ina kay Gloria. Madakup ang magagmay nga *pusher* pero bangud ang puno kag punta sang problema sa droga sa pungsod amo man ang reaksyunaryong guberno kag ang armadong pwersa sini, indi ini maresolba." Ini ang reaksyon ni Ka Peping, isa ka nagapamuno nga kadre sang Partido nga madugay na nagahulag sa Samar.

Kon ang pagabasehan amo ang mga tawag sang pumuluyo kag pahayag sang mga komentarista sa radyo, siling niya, isa gid lang ang ginahambal nila: Wala na sila sang paglaum nga malubad pa sang PNP ukon AFP ang problema sa droga bangud ang mga ini imbolbado kag sa kamatuoran yara sa likod sang mga sindikato sa droga. Ang BHB na lamang ang makalubad sini.

Ang matuod, sa anuman nga bahin sang rehiyon kon sa diin nagaluntad na ang Pulang gahum pangpulitika sang pumuluyo, nadula na ang problema sa ilegal nga droga ukon wala kahigayunan maglapnag pa ini. Kon may yara pa nga kaso nga natukiban, madasig ini ginaaksyunan paagi sa desaysibong mga tikang sang mga rebolusyonaryong organisasyong masa kag, kon kinahanglanon pa, sang hangaway sang banwa.

Suno kay Ka Peping, ang isa sa mga una nga tikang sa pagsulod sang rebolusyonaryong hubalg sa anuman nga lugar amo ang paghibalo kon sanday sin-o ang malain nga elemento sa komunidad. Lakip diri ang mga tawo nga imbolbado sa mga anti-sosyal ukon kriminal nga buluhaton pareho sang pagpangawat, pagpangawat karbaw, prostitusyon kag pagduso sang ilegal nga droga.

Ang pangunahon nga pamaagi sa pag-atubang sa mga ordinaryong tawo nga imbolbado sa sining buluhaton amo ang pulitikal: mapasensyahon nga pagpaathag sang maayo nga katuyuan sang rebolusyon kag sang importansya sang paghiliusa sang pumuluyo sa tunay


nga kaaway. Ginaathag sa ila nga ang pagka-imbolbar sa mga kriminal kag anti-sosyal nga hilikuton makapaguba sa rebolusyonaryo nga paghiliusa kag makasamad sa interes sang pumuluyo. Sa kaso sang ginadumilian nga droga, ginapaathag ang malain nga epekto sini sa ikaayong lawas.

Sa mga una nga tikang pa lamang sini, siling ni Ka Peping, nagaluntad na ang dramatikong epekto. "Mabatian lamang sang mga *drug pusher* ang presensya sang BHB sa isa ka baryo awtomatiko kag signipikante ang pagbuhin sa ila numero kag aktibidad."

Sa pag-uswag pa sang pangpulitika nga hilikuton sa baryo, nagangkon sang nagapadaku nga papel ang mismo mga organisasyong masa sa pagsiguro nga limpyo ang ila lugar sa mga ginadumilian nga droga.

Siling ni Ka Peping, kon may mabalitaan sila nga tawo nga nagaduso sang droga, ginakumprontar nila ang mga ini kag ginapaathagan agud mag-untat. "Sa masami," siling niya, "nakumbinse nga mag-untat ang mga ini." Kon may mas madalom pa sila nga problema ginabuligan man sila nga lubaron ang mga ini. Padayon nga nagapangusisa kag nagabantay ang mga upisyal sang organisasyon kon matuod nga nagbag-o na ang mga ini.

Pero kon sa pihak sang paliwatliwat nga pagsugilanon indi pa mag-untat ang mga ini, ginapasaka sang organisasyon sa BHB ang problema. Kag mas pat-ud, ang



agapaandaman sila sang BHB ang dalayon nga makapauntat sa paggamit nila sang droga.

Ang mga ordinaryong tawo nga nagagamit sang droga mapasensyuso kag wala-untat ginapaathagan, ginakumbinse kag ginabuligan. Bangud pinakabulnerable sa droga ang pamatan-on, yabi sa pagsiguro nga indi sila mabiktima sini amo ang pagpukaw, pag-organisa kag pagpaaktibo sa ila para sa rebolusyon. "Sa mga konsolidado kag ginakonsolida nga baryo," siling ni Ka Peping, "halos lubos panahon nakasentro ang organisasyon sang pamatan-on sa mga pangpulitika kag pang-ideolohiya nga pagtuon, sa pagpalapnag sang patriyotiko kag progresibong kultura, sa pag-organisa kag sa hilikuton produksyon. Wala na sila panahon ukon interes pa sa mga garuk kag dekadente nga aktibidad."

Samtang nagadalom ang pagpanggamot sang rebolusyon sa isa ka lugar, ang huyog sang organisadong pamatan-on amo ang maghulag sang bug-os panahon para sa rebolusyon. "Sa kamatuoran," siling ni Ka Peping, "ang daan nga mabaskog nga huyog sang pamatan-on nga Samareno nga bayaan

***"Pagbatuk...",* halin sa pahina 7**

ang ila mga baryo agud magtrabaho sa Maynila amat-amat na nga nabaliskad. Ang nangin huyog amo ang 'pasulod' ukon magpultaym sa hangaway sang banwa."

Ginapalapnag sang mga organisasyong masa sa mga baryo ang "Kampanyang Salinlahi" ukon ang panawagan mag-amot sang anak sa rebolusyon ang kada pamilya agud matughungan sang bag-o nga dugo ang kahublagan kag may mga kabaylo ang mga kaupod nga naga-kaedad na ukon nagakapatay sa paghimakas. "Mismo mga ginikanan ang nagabuyok sa ila mga anak nga

magpultaym sa Hangaway," paathag ni Ka Peping. "Kabahin na sang pang-adlaw-adlaw nga kabuhi sa baryo ang rebolusyon kag ginahandum sang pamatan-on ang pag-entra sa hangaway sang banwa kag pag-alagad sa rebolusyon. Paano pa makaisip nga magdroga ang pamatan-on sa amo nga kahimtangan?"

Lain katama ang sitwasyon sa mga sentrong banwa kag iba pang lugar nga wala pa maabot sang kahublagan ukon mangin sa mga baryo nga madugay nabayaan sang BHB. Sa isa ka baryo sa Northern Samar nga napilitan bayaan sang BHB kag natukuran sang detatsment sang

AFP sadtong temprano nga bahin sang 1990, mismo ang mga militar ang nagaduso sang droga agud mangin garuk ang mga tawo kag waskon ang rebolusyonaryon nga baseng masa. Sa sulod sang apat ka tuig, sistematiko nga ginsiod sang militar ang mga tumod nga myembro sang orghanisasyon sang pamatan-on kag kababaihan agud maggamit sang shabu. Nauntat lamang ini sang madinalag-on nga napalayas sang pumuluyo ang detatsment sa baryo.

Sa Catarman, kabisera sang Northern Samar, pati mga pulis ginabaligyaan sang shabu sang hepe

Sundan sa "Pagbatuk...", pahina 9

Ang AFP kag PNP ang pinakadaku nga sindikato sa droga sa pungsod

Piho nga mapaslawan ang pagguwaon ni Arroyo bahin sa "gera batuk sa ilegal nga droga" bangud ang AFP kag PNP mismo ang pinakadaku nga sindikato sang droga sa pungsod.

Sa isa ka pahayag sang Chadli Molintas Command (CMC) sang Bag-ong Hangaway sang Banwa sa Ilokos-Kordilyera sining Hulyo 9, mabaskog nga ginkundenar sini ang sistematikong kampanya sang pagpanamad nanday Arroyo kag sang AFP kag PNP sa Bag-ong Hangaway sang Banwa kag ginpabutyag nga ini ang yara sa likod sang pagtanum sang marijuana. Paagi sini, gintinguha gid ni Arroyo kag sang AFP-PNP nga takpan ang pagkadalagang sang AFP-PNP sa mga sindikato sa droga.

Ginsiling sang CMC nga sa kamatuoran, ang mga plantasyon sang marijuana sa Benguet ginsuguran ni Gen. Reynaldo Acop, anay hepe sang PNP Cordillera Regional Command kag ginpadayon sang mga nagbulos sa iya. Sa Kalinga naman, ang Cordillera People's Liberation Army, isa ka pwersa paramilitar nga pormal na nga nagsimpon sa AFP, ang nagamentenar sang mga plantasyon. Ini tuman ka hayag kag mapamatud-an sang masa sa mga lugar nga ini, siling sang CMC.

Sa pungsodnon nga sakup, ginareport mismo sang Presidential Task Force on Intelligence and Counter-intelligence nga linibo nga pwersa sang AFP kag PNP ang myembro sang 507 sindikato sa droga

kag ang mga upisyal-militar nila nagakita sang P50 bilyon kada tuig halin sa pagbaligya sang droga nga ila nadakup kag pagbaton sang *protection money* halin sa mga sindikato sang droga. Luwas sa jue-teng, ang pagnegosyo sang ilegal nga droga ang isa sa pangunahon nga ginahalinan sang indi mapaathag nga manggad sang mga pinuno sang AFP kag PNP.

Suno sa CMC, indi marijuana ang ginatanum sang BHB kundi rebolusyonaryong kamuklatan kag mga militanteng pagpursiger sang mga demokratikong kinamatarang sang pumuluyo. "Ang BHB isa ka disiplinado nga hangaway. Ginakangil-aran kag ginasiway sini ang burgis nga kagarukan, lakip ang pag-abuso sa droga, sugal, prostitusyon kag iban pa nga anti-sosyal nga aktibidad nga duna sa mga garuk nga sistema sosyal pareho sang kapitalismo kag sa mga malapyudal nga katilingban pareho sang Pilipinas."

Ginsiling man sang CMC nga sa mga lugar kon sa diin nagatanum sang marijuana ang masa, ginalunsar ang mapagsik nga kampanya pang-edukasyon agud talikdan sang masa ang amo nga praktika kag para mahibal-an nila nga rebolusyon kag indi pagtanum sang marijuana ang solusyon sa ila kaimulon. Nagalunsar man ang rebolusyonaryong hublag sang rebolusyonaryong reporma sa duta kag nanari-saring mga sosyo-ekonomikong programa agud may alter-natibong palangitan-an ang mga mangunguma. **AB**



"Pagbatuk..." halin sa pahina 8

mismo sang *anti-drugs operations* sang PNP—si SP03 Vic Delfin. "Isa man siya ka masupog nga kontra-rebolusyonaryo kag lider sang sindikato sang mga hold-aper nga nakabase sa Maynila," siling ni Ka Peping.

Sa San Juan, San Isidro, Northern Samar, ginreport sang masa nga mismo kumander sang patrol base sang AFP ang nagapabakal sang shabu sa iban nga baryo sang maubusan ang yunit niya sang suplay sini.

Sa Allen, Northern Samar, ang suplayer sang shabu amo si PNP Maj. Andy Suan, nga subong nadestino sa Maynila. Kilala siya nga malapit kay Panfilo Lacson.

Sa Guian, Eastern Samar, mismo ang meyor sini ang naga-serbi nga *drug lord*. Gamit ang ginakita sa droga, plano pa nga magkandidato sang meyor nga ini sa kongreso ukon pag-ka-gubernurador sa 2004.

Sadtong Pebrero 2002, demanda sang mabaskog nga kagustuhan sang pumuluyo, ginsilutan sang Mt. Amandewin Command sang BHB sa Leyte si Inaki Guljuran, isa sa pinakadaku nga *drug lord* sa Ormoc City kag mga kaiping nga banwa.

"Kilala namon ang kada isa sa mga numero uno nga nagaduso sang droga sa rehiyon," siling ni Ka Peping. "Ginapaandaman namon sila nga mag-untat na sa ila kriminal nga buhat." AB

3 elemento sang RHB, ginbista sa korte sang pumuluyo

Gindakup sang yunit sang BHB ang tatlo nga tinawo sang bandido nga "Rebolusyonaryong Hukbong Bayan" ukon RHB sadtong gab-i sang Hunyo 11 sa Sityo Kabukiran, Barangay Kalaylayan, Abucay, Bataan. Ang mga gin-aresto amo sanday Dony Valencia alyas Relly, 24, sang Barangay Wawa; Edwin Egay alyas Lester, 19, sang Barangay Gabon; kag Dindo Diaz, 23, sang Barangay Salian. Nakumpiska sa ila ang isa ka .45, isang ka 9 mm kag isa ka .38 kag duha ka cellphone.

Ang tatlo gintrato sang maayo sang mga kaupod bilang mga bihag samtang yara sa proseso sang imbestigasyon kag pagbista. Sa amo man, sila ginpalayo sa peligro sang mapaway ang yunit nga nagabantay sa ila sadtong Hunyo 14.

Pagkatapos pamatian ang mga kaso nga ginpasaka sa ila, napamatud nga wala sang nagakaigo nga basehan para silutan sanday Egay kag Diaz. Ginhilway ang duha kag gin-entregar sa amay ni Egay. Samtang, ginsilut kay Valencia ang kamatayon pagkatapos makumpirma ang anum ka kaso sang pagpamatay.

Kalakip sang iya mga pinamatay amo sanday Jimmy Sangalang sang Wawa, Abucay kag Anu sang Mabatang, Abucay. Gilayon man nga ginpaabot sang mga kaupod sa mga ginikanan sini ang husgar kag kon sa diin nila makuha ang bangkay. (*Halin sa Himagsik, rebolusyonaryong pahayagan sang Central Luzon*) AB

ANG BAYAN Hulyo 21, 2003

Obispo sang Imol



Mas o menos 30,000 katawo ang nagdul-ong kay Bishop Antonio Fortich sa iya katapusan nga palahuwayan sa San Sebastian Cathedral sa Bacolod City sining Hulyo 16. Ginprusisyon nila ang bangkay sang obispo sa plasa sang syudad bandang alas-9 sang aga. Lakip sa nagtambong amo ang nanari-saring militanteng organisasyon sa pagpanguna sang Bayan Muna.

Bandang alas-9:30, ginsuguran ang misa kon sa diin ginbasa ang pagpasidunggog ni Pope John Paul II sa ginatawag Obispo sang Imol. Ginpasidunggan sang lider sang simbahan Katoliko ang "matutom nga pagpamuno ni Fortich bilang obispo sang Diocese sang Bacolod kag ang iya aktibo nga pagsuporta sa dignidad kag mga kinamatarung sang mga imol."

Antes ang adlaw sang iya lubong, nagbaton man sang pasidunggog si Bishop Fortich halin sa nagkalain-lain nga rebolusyonaryong lider kag organisasyon.

Sining Hulyo 4, ginpasidunggan ni Frank Fernandez, anay tagapamaba sang NDF. Siling ni Fernandez, wala niya ginsurender ang iya mga prinsipyo sa pihak sang pagpang-ipit halin kay Marcos kag lokal nga berdugo sini nga si Roberto Benedicto. Sa pagpamuno sang obispo, ang mga tawong simbahan padayon sa paghugpong sa mga rebolusyonaryo kag progresibong pwersa

tubtub sa pagpukan sang pasistang rehimen.

Sining Hulyo 15, nagsaludo kay Bishop Fortich si Gregorio “Ka Roger” Rosal, tagapamaba sang Partido Komunista sang Pilipinas. Gintumod ni Ka Roger ang militante nga pagsakdag sang obispo sa kinamatarung sibil kag ang pagpartisipar niya sa mga paghimakas sang pumuluyo batuk sa pasismo kag pyudal nga pagpanghimulos.

“Tuman nga ginkaakig niya kag ginkundenar ang di matarung nga kahimtangan sang katunga sang katilingban, sa isa ka bahin, sa pila nga yara sa nagaharing sahi nga nagapatuyang sa ila sobrang manggad nga naghalin lamang sa wala kaluoy nga pagpanghimulos kag pagpang-agaw kag, sa pihak nga bahin, sa mayorya nga pumuluyo nga labing ginagutom, ginharian kag pigos,” siling ni Ka Roger.

Nagpahayag man sining Hulyo 10 sang himpit nga pagkasubo sa pagpanaw ni Bishop Fortich sanday Ka Luis Jalandoni kag Ka Coni Ledesma sang National Democratic Front. Siling nila, “Para sa aton tanan, kag sa mga masunod pa nga henerasyon nga magasulong sa mataas nga handum ni Monsignor Fortich para sa hustisya sosyal, tunay nga reporma sa duta, malawigan nga kalinungan base sa hustisya kag sa iya panindugan nga itib-ong ang dignidad kag kahilwayan sang nagahimakas nga pumuluyo, mabatyagan naton ang iya presensya, kusog kag wala kamatayon nga inspirasyon.”

Isa man nga pasidungog ang ginhalad sang rebolusyonaryong Christians for National Liberation (CNL) sa napatay nga obispo sining Hulyo 13. Ginakabig sang CNL ang huwaran nga kabuhi ni Bishop Fortich bilang wala-nagalubad nga inspirasyon kag hangkat sa tanan nga Kristyano nga hakson ang kawsa sang mga sahing ginahimuslan kag ginapigos.

“Sa tunga sang brutal nga pasismo sang estado, pyudal nga pagpamigos kag imperyalistang dominasyon sa Negros kag sa bilog nga pungsod, ang iya kabuhi bilang isa ka rebolusyonaryong Kristyanong himpit nga nagpangamuyo, naghambal kag naghulag para sa mga sandigan nga kinamatarung kag interes sang imol isa ka indi mahikayan nga kontribusyon sa pagpasulong sang rebolusyonaryong paghimakas,” dugang sang CNL.

Manubo nga upisyal kag ordinaryong suldado sang AFP, ginatublag

Diskriminasyon sa mga manubo nga upisyal kag ordinaryong suldado, manubo nga sweldo, korapsyon kag iban pa nga indi maayo nga pagdumala sang pamunuan sang AFP ang ara sa likod sang pagkatublag sining karon lang sa sulod sang organisasyon sang militar. Salaming sang pagkatublag nga ini ang unod sang isa ka manipesto nga ginpagguwa sadtong Hunyo sang bag-o nga tukod nga Concerned Army Officers of Sulu nga nagatilawas sa “linibu-libo nga ordinaryong suldado nga yara sa prente sang armadong pagpakig-away.”

Halos pareho sang mga reklamo nila ang mga ginpagguwana sang Reform the Armed Forces Movement (RAM) kag Young Officers Union (YOU) sadtong temprano nga bahin sang dekada 1980. Pamatuod ini nga wala sang kinalain kag labing naglala pa gani ang mga kagarukan kag indi maayo nga pagdumala sang mas mataas nga mga upisyal-militar.

Naglab-ot na ini sa mga huring-huring nga may plano maglunsar sang kudeta ang may reklamo nga mga upisyal kag suldado. Ugaling imbes atubangon ang ila mga reklamo, ginhangkat pa sila sang DND nga maghayag kag ginpaandaman indi maglunsar sang kudeta batuk sa gubynong Arroyo.

Kaangot sini, nagpahayag sang pagpakigsimpatiya sa mga manubo nga upisyal kag ordinaryong suldado sang AFP ang Partido Komunista sang Pilipinas. Sa isa ka pahayag, ginsiling ni Gregorio “Ka Roger” Rosal, tagapamaba sang Partido, nga nagapatuyang ang mga pinuno sang DND kag AFP sa tuman ka daku nga sweldo kag mga luho kag espesyal nga pribilehiyo kag nagahugakum man sang dalagku nga manggad halin sa pagpangurakot sa mga pondo para sa mga ordinaryong suldado kag sa *disaster relief*, kikkab halin sa mga kontrata, kita halin sa mga kriminal nga sindikato pareho sang droga, *kidnapping for ransom*, holdap sa bangko kag iban pa nga kriminal nga aktibidad. Sa pihak nga bahin, ginagamit lamang nga pangbala sa kanyon ang mga manubo nga upisyal kag ordinaryong suldado.

Malaut pa, siling ni Ka Roger, wala hawid-hawid nga gina-

“...nagapatuyang ang mga pinuno sang DND kag AFP sa tuman ka daku nga sweldo kag mga luho kag espesyal nga pribilehiyo kag nagahugakum man sang dalagku nga manggad halin sa pagpangurakot sa mga pondo para sa mga ordinaryong suldado...”

Sundan sa “Manubo nga upisyal...,” pahina 11

ANG BAYAN Hulyo 21, 2003



Nagapala nga kundisyon sang ekonomya sang US

Sining Hunyo, nag-taas ang tantos sa disempleyo sa US sang 6.4%, pinakamataas sa sulod sang siyam ka tuig. Patimaan ini sang nagapadayon pa subong nga resesyon sang imperyalistang ekonomya nga nag-umpisa sadto pa nga Marso 2001, baliskad sa madugay na ginalauman sang mga pinuno kag negosyante sa US nga liwat makatibawas na ekonomya sang US sugod 2003.

Halos 9.4 milyon nga mamumugon nga Amerikano ang wala trabaho subong. Ang 2.7 milyon diri ang wala trabaho sugod sang nangin presidente si George W. Bush sadtong umpisa sang 2001. Sa sulod sining ulihi nga tatlo ka bulan—humalin Marso tuhtub Hunyo—maabot sa isa ka milyon ang napahalin sa ila mga trabaho. Sa kamatuoran, nagaabot na lamang sa 74.3% ang nagagamit sa kapasidad sang pabrika sa US, pinakamanubo sa sulod sang 19 tuig. Madamuan man ang pagpapahalin sa mga kumpanya sa airlines kag mga kumpanya sa “bag-ong ekonomya” pareho sang telekomunikasyon kag *internet*. Ang amo sini kadaku kag nagapadayon nga pagkadula sang trabaho sa US ulihi natabo

sadto pa nga 1980-83 kag mas temprano pa, sadtong 1956-58.


Kadungan sini, labi man nga naglala ang depisito sa negosyo sang US. Sadtong Mayo, nag-abot na sa \$418 bilyon ang depisit sa balanse sa negosyo bunga sang paghina sang eksport kag pagdaku sang balor sang ginaangkat nga langis.

Ang polisiya pang-ekonomya sang rehimeng Bush nagbunga man sang nagapadaku nga depisit sa pungsodnon ng badyet. Gin-uyangan sang rehimeng Bush ang nabtan sini nga \$334 bilyon nga surplus sang gubyernong US kag sa sulod lamang sang tatlo ka tuig nagdangat na ini sa neto nga depisit nga \$455 bilyon—nagakahulugan sang kabilugan nga aktwal nga depisit nga \$789 bilyon. Bisan ang netong depisit nga \$455 pinakadaku na sa bug-os nga kasaysayan sang US.

Resulta sining nagapalala nga depisit ang: 1) patuyang nga

paggastos sa militar kag paglunsar sang mga gera sang US kag pagmentenar sang pwersang pang-okupasyon sa Iraq kag, antes sini, sa Afghanistan; 2) pagpabor sa pinakadaku nga kumpanyang US paagi sa mga pagbuhin sa ginabayaran nila nga buhis; kag 3) malaparan nga pagkakas sang mga mamumugon kag pagbuhin sa subsidyo para sa mga imol nga nagresulta sa pagkitid sa balaligyan kag base sang nagabayad sang buhis.

Ginatantya nga nag-abot na sa \$48 bilyon kada bulan ang galastuhan sang US para sa padayon nga okupasyon sang Afghanistan kag Iraq para lamang sa tuig nga ini. Nagabalor naman sang \$330 bilyon ang buhis nga wala na ginabayaran ni Bush sa dalagku nga mga kumpanya nga ginhatagan sang *tax exemptions* kag *tax breaks*. AB



“Manubo nga upisyal...,” halin sa pahina 10

gamit sila agud waskon ang mga pamalay, kawatan sang mga hinuaptanan nga hayop, samaron ang mga pananom, patyon kag paantuson ang mga inosente kag lapakon ang mga tawhanon nga kinamatarung sang mga ordinaryong pumuluyo.

Ginhangkat sila ni Ka Roger nga sakdagon ang

patriyotiko kag demokratikong handum sang pumuluyong Pilipino, lubos nga talikdan ang reaksyunaryo, garuk kag palutos nga dalan sang AFP, kag mag-entra kag magsuporta sa rebolusyonaryong hublag. Sa partikular, nanawagan si Ka Roger nga sundon nila ang halimbawa ni Lt. Crispin Tagamolila, isa ka gradweyt sang Philippine Military Academy nga nag-entra sa Bag-ong Hangaway sang Banwa. AB

Danyos para sa mga biktima sang diktaduryang Marcos, gina-insister

GINA-INSISTER subong sang Samahan ng mga Ex-Detainee Laban sa Detensyon at Para sa Amnestiya (SELDA) nga aprubahan na ang hagna House Bill 4535 nga nagapain sang sangkatlo sang kinawatan nga manggad sang mga Marcos para sa 10,000 biktima sang layi militar. Ini pagkatapos desisyunan sang Korte Suprema sining Hulyo nga ihatag sa gubyrno ang \$150 milyon nga kinawatan nga manggad sang mga Marcos nga madugay na nakadeposito sa Philippine National Bank.

Ginpabutyag sang SELDA ang panawagan sa tunga sang mga maniobra sang pamilyang Marcos kag mga kroni sini nga balabagan ukon palabnawon ang anuman nga layi nga magahatag sang signipikante nga bahin sang kinawatan nga manggad sa mga biktima sang diktadurya. Sining ulihi gin-anunsyo man ni Arroyo ang pagtalana lamang sang P8 milyon para sa mga biktima—nga tuman kalayo sa P2.5 bilyon nga dapat makadto sa ila halin sa \$150 milyon nga manggad.

GRP, ginbawi ang mga kundisyon nga gina-insister sa MILF

SINING Hulyo 18, nagpasugot ang rehimeng Arroyo sa mga gina-insister sa MILF kag gin-suspender sini ang mga mandamyento de aresto kag mga padya sa pagdakup sa 10 ka lider sang MILF kag gin-untat man ang pagbansag nga “terorista” ang MILF. Duso ini sang mabaskog nga panawagan sang madamo nga sektor, lakip na ang madamo nga imam (lider relihiyosong Muslim), nga hatagan-dalan ang sugilanon pangkalinungan sa tunga sang gubyrno kag MILF.

Angot sini, gin-abisuhan ang MILF ni Gregorio “Ka Roger” Rosal, tagapamaba sang Partido, nga maghalong sa mga mapaniplang nga padihut sang papet nga gubyrno kag magpamatyag man sa pagsulod subong sang US sa sugilanon pangkalinungan.

Samtang, gilayon nga ginlapas sang AFP ang untat-lupok sini sa MILF sang salakayon sang mga suldado ang isa ka balwarte sang MILF sa Pagalungan, Maguindanao.

Mapintas nga dispersal sang rali sa Iloilo, ginkundenar

GINPAKAMALAUT sang mga militanteng organisasyon kag tagasakdag sang tawhanon nga kinamatarung ang kalakasan sang mga pulis kag vigilante sa 200 nga nagpiket sa atubangan sang Barcelo Sarabia Manor Hotel kon sa diin nagdayon si Pres. Arroyo sang mag-agi ini sa Iloilo City sadtong Hulyo 15.

Masobra 200 ka pulis kag mga pwersang vigilante nga nakapaidalom sa Civilian Volunteers Organization kag Bantay Bayan Foundation ang nagtigayon sang pagbungkag, nga amo ang pinakamapintas sining ulihi nga tinuig. Ang mga nagrali kabahin sang Bagong Alyansang Makabayan (BAYAN)-Panay, Kilusang Mayo Uno, Kadamay, Pagkakaisa ng mga Samahan ng Tsuper at Operators Nationwide (Piston), Anakpawis, Anakbayan at iba pa nga militanteng organisasyon sa Iloilo.

Anum ka demonstrador ang napilasan kag napulo ang ginhunong.

Polisiya nga “open skies” igapatuman na sa pungsod

NAGGUBA sining Hulyo 18 ang negosasyon sa tunga sang US kag Pilipinas nahanungod sa liwat nga pagpaatraas sa lubos nga implementasyon sang polisiyang “open skies” nga nakatalana na sa Oktubre 1. Tatlo ka beses nga ginpaatras ang implementasyon-sang kasugtanan nga ginlagdaan sadto pa nga 1982 sang rehimeng Marcos sa dikta sang imperyalismong US.

Sakup sang polisiyang “open skies” ang liberalisasyon indi lamang sang mga byahe sa tunga sang US kag Pilipinas kag sa tunga sang Pilipinas kag ibang pungsod, kundi pati mga byahe halin kag pakadto sa iban nga bahin sang Pilipinas.

Ginapamilit sang US ang kinamatarung magnegosyo sa Pilipinas sang mga airlines sang US nga daw yara sila sa teritoryo sang US, bagay nga labag sa konstitusyon sang Pilipinas. Ginagamit subong nga tapalan sang US agud ipamilit ang gilayon nga pagbag-o sa konstitusyon para madula ang mga sablag sa imperyalistang paglapak sa patrimonya kag sobe-ranya sang Pilipinas.

Ang polisiyang “open skies” magaresulta sa padayon nga pagkaputo sang mga lokal nga kumpanya sa *airlines* pareho sang Philippine Airlines kag Cebu Pacific Airways.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Tuig XXXIV No. 12
Hulyo 21, 2003
www.philippinerevolution.org

Editorial

Pamatukan kag paslawon ang pagtapna sa ligal nga demokratikong hublag

Isa ka tikang nga daw-Marcos ang mandu ni Pres. Gloria Arroyo nga tapnaon kuno ang mga “ligal nga prenteng organisasyon sang Partido Komunista.” Kag pareho sa pagdeklarar ni Marcos sang layi militar sadtong 1972, indi lamang napaslawan ang mandu nga ini nga pungan ang nagapadayon nga pagsulong sang rebolusyonaryong kahublagan. Labi pa sini nga ginaduso ang pumuluyong Pilipino nga magsuporta kag magpasakup sa Bag-ong Hangaway sang Banwa (BHB) kag mag-entra sa armadong rebolusyonaryong hublag.

Ang mandu nga ini isa ka desperadong tikang sa atubang sang sunod-sunod nga madinalag-on kag nagalanog nga taktikal nga opensiba sang BHB. Sa kapaslawan nga pungan ang pagsulong sang armadong rebolusyon sa pihak sang “todo gera kontra-terorismo” sang rehimen Arroyo, labing ginainitan sini subong ang mga ligal nga organisasyong patriyotiko kag demokratiko nga malisyosong ginapareho sa PKP kag BHB agud hatagan-rason ang paggamit sang kusog sang estado batuk sa mga

ini.

Pareho sa nagtaliwan nga rehimen, militarismo kag pasistang terorismo ang sabat sang rehimen Arroyo—sa sugyot sang amo sini nga imperyalismong US—sa nagalapad kag nagakusog nga pagpamatuk kag pagbatu sang masa nga labing ginapaantos sang krisis sang reaksyunaryong nagaharing sistema. Ang madalom nga diskuntento kag pagkatublag sang malapad nga pumuluyo ginbunga sang nagadasig nga pagtibusok sang ekonomya kag sang ila pangabuhian, kag sang wala ikasarang sang nagaharing sahi nga makasabat bisan sa mga pinakasandigan nga kinahanglanon sang mayorya sang pumuluyo kag paglala sang pagpamigos kag pagpang-ipit sa ila.

Indi lamang mapaslawan ang imperyalismong US kag mga lokal nga reaksyunaryong nagaharing sahi sa paglubad sa tuman kadalom nga krisis sa ekonomya kag pulitika sang garuk nga sistemang mala-kolonyal kag malapyudal. Labi pa sini ginapalala ang krisis sang nagtaliwan nga dekada sang lipong nga ginduso sang sunod-sunod nga mga papet nga rehimen ang pungsod sa todo nga pagpang-halit sang imperyalistang globalisasyon kag polisiyang neoliberal nga ginpanaog sang imperya-



Sa isyu nga ini...

**Nagaigting ang
banggianay
Cojuangco-Arroyo**

PAHINA 4

**Pagtukod sg sanga sg
MAKIBAKA sa isa
baryo sa Bikol**

PAHINA 6

**Pagbatu sa ilegal nga
droga sa Eastern
Visayas**

PAHINA 7